

Dentro di 1 luna e trabaonan lo cuminsa...

PA 1998 LO BAY MIRA CAMBIONAN GRANDI NA SAN NICOLAS Y VECINDARIO

ORANJESTAD(AAN) — Ministro di Asuntunan Economico, Tico Croes, a duna cu durante e reunion di Consejo di Ministro, a keda dicidi cu lo cuminsa cu 9 proyecto di e mas cu 30 cu Plan Sasaki ta consisti di dje.

E proyectonan aki lo cuminsa simultaneamente dentro di 1 luna. Algun di e proyectonan ta entre otro e construcion di 200 cas na Juana Morto, construcion di e pool y construcion di casnan na Savaneta, e parque nacional na Arikok y e face lifting di e curazon di San Nicolas.

E promer proyecto cu lo inicia na San Nicolas mes ta e construcion di un piscina di 25 meter cu lo ta situa banda di YMCA. E piscina aki ta forma parti di e plan pa renova e stadion. E stadion lo bay conoce un renovacion completo esta dak nobo, luznan nobo, lugar pa receo nobo, un entrada nobo, e veld lo worde reorganiza mientras cu e cayanan den vecindario di e stadion lo worde modifica pa acomoda lugarnan adicional pa staciona auto.


E muraya di e stadion existente den Hendrik Straat, cu ta forma un barera lo worde basha abao y lo traha un entrada mas visual cu un parque.

E di dos proyecto cu lo bay concentra ariba ta e vecindario di watertoren.

Lo bay construi un mercado destina pa venta di fruta, berdura y otro tipo di alimentacionnan. E meta di esaki ta pa crea un bida den centro di San Nicolas. E rum shop historico situa den Bernhard Straat lo keda como un parti integral di e parti ey.

Banda di e mercado aki lo bay construi un parada central di bus caminda tur hende lo por coy bus pa bay Oranjestad, hotel, etc.

Un tiki mas zuid lo construi un parque cu ta conecta cu e mercado y e futuro museonan cu lo worde construi.



E parque a worde diseña di tal forma cu ta brinda un lugar pa sinta cu stoel den sombra. Na e otro banda di e parque aki tin un otro area habri cual lo bira e mercado di artesanía caminda articulan traha na man pa nos artistanan lo worde bendi. E intension ta pa esakinan bira atraccionnan pa turistanan di Oranjestad worde hiba San Nicolas.

E meta ta cu na final di 1998 e proyectonan aki mester ta cla. A worde splica cu e forma con e proyectonan aki lo worde ehecuta ta cu e grupo Sasaki lo coordina e proyectonan, mientras cu e trabaonan mes lo worde haci pa companianan local.

E ultimo proyecto cu lo bay concentra ariba ta e "face lift" di e entrada di San Nicolas na altura di e cruzada dilanti oficina di FTA.

E cruzada aki lo worde rediseña pa ta uno mas sigur pa trafico. Lo bay embecece henter e caminda cu ta conduci na e curazon di San Nicolas. E embececimento lo consisti di: borchinan, luz, caminda pa hende por cana. E meta di esaki ta pa ora uno core ariba e caminda aki, e ripara cu el a drenta San Nicolas.

Lo bay consulta cu habitantenan ariba e caminda aki pa nan coopera cu e embececimento aki. Esaki no kiermeen cu lo bay mishi cu nan propiedad. Sin duda esaki lo bay duna San Nicolas un cara completamente diferente y ta haci San Nicolas un lugar mas comodo y agradabel pa biba.

Loke ta ser indica ariba e mapa aki ta solamente un parti di e proyectonan cu tin planea pa San Nicolas. Unavez cu esakinan keda conclui lo sigui cu otro partinan manera e centro, Promenade, Village, e parque na Arikok. Den nos proximo edicionnan, DIARIO lo bin mas extenso ariba e Plan Sasaki.